

Nowodhow an Seythen

05/03/09

Yth esowgh hwi ow koslowes orth *Nowodhow an Seythen* gans Ben Bruch.

Dy' Yow, an 5es a vis Meurth yw Gool Pyran, Tassans Kernow, hag yma Kernowyon ha Kernewegoryon oll a-dro dhe'n bys owth omlowenhe hedhyw – hag, yn gwir, dres an seythen dhien! Ytho gwrewgh gwevya agas baneryow Pyran, yn keniver bro mayth esowgh!

Hedhyw y talleth an darvosow yn Porthperran gans drehevel Baner Pyran dhe dheg eur myttinweyth, gans keskerdh dhe Eglos Sen Petrok a-wosa.

Y fydh keskerdhow yn Lanstefan, Bosvenegh, ha Truru ynwedh.

An keskerdh yn Truru a dhalleth dhe gwarter wosa unn eur dohajydhweyth dhyworth Fordh Sen Jori, hag y fydh Yeth an Werin ha sedhek ilow a-wosa y'n Tavern Korev Koth, ytho drewgh agas daffar ilow ha levow!

Gorthuherweyth y fydh pella darvosow yn Marhasvyhan, Lulyn, ha Lanstefan.

Nos Wener, y fydh Nos Lowen gans *Dalla* orth Pennskolyow Kesunys Kernow, Kampus Wood Land, yn Aberfal. An ilow ha dons a dhalleth dhe seyth eur gorthuherweyth.

An pennseythen ma y fydh meur dhe weles ha dhe wul yn Porthpyran, ha dy' Sul an 8ves y fydh gwari Sen Pyran synsys dhe 2 eur, ow talleth yn Park Trethow Pyran.

Skodhyoryon an para rygbi an Vorladron Gernewek a vydh lowen dhe glewes i dhe synsi gool ynwedh dy' Sul yn Kambron, ow talleth dhe 11 eur kyns aga fit erbynn Bedford. Pella derivadow a gevir war aga gwiasva i.

Henn yw oll rag lemmyn, mes *Nowodhow an Seythen* a dhehwel y'n seythen a dheu, gans pella kedhlow a-dro dhe'n pyth usi ow hwarvos yn Kernow hag a-dro dhe'n bys bras a Gernewegoryon.

A-barth Matthi Clarke, Albert Bock, ha meni Radyo an Gernewegva, hemm yw Ben Bruch, ow leverel dhywgh meur ras, ha Gool Pyran Lowen dhywgh hwi oll!